

湘

軍

志

湖北篇第三

湘軍志三

寇興四年而湖北軍五潰揚霽之敗也實未見寇亂民一呼而萬眾瓦解省城初才二千兵及城陷時城內外防守軍萬二千見黃旗則爭縋城走外兵亦走水師固不任城守事省城潰自保而已寇至城下用縋城繩引而上城中唯巡撫陶恩培署按察使武昌知府多山及僕從五六人恩培先赴水死多山焚城上大礮擊來寇礮不發拜祝之再然火煙出而無聲發憤自剄死布政使胡林翼按察使李孟羣皆將兵赴援屯城外副將王國才方馳入城城閉亦用縋城繩以上至藩署羣盜方

會飲重門開列火以為燎國才乃悟業已入因率親兵
入暴斫之羣寇驚走且呼街巷間有出者輒為官軍所
斫俄傾而定城中居民固未復業至是早盡逃國才惘
惘不知所為則登城招水陸軍不見一人明日出城合
林翼屯語激昂林翼心忤焉俄而寇大至知其事者交
訟國才奇功遂傳言國才於道獲寇諜得口號呼門而
入為讒嫉者所蔽惟及見國才者知其實焉咸豐五年
三月乙丑 詔胡林翼署湖北巡撫林翼前知鎮遠黎
平治盜嚴三年冬以御史王發桂薦奉 詔赴湖北未
至總督吳文鎔敗死留湖南將黔勇三百人碌碌未有

以自見曾國藩征寇奏以自隨湖南巡撫駱秉章方倚
幕客左宗棠以決事宗棠故善林翼奏留防岳州捕誅
崇通姦民斬刈過當已而曾軍克田鎮合兵圍九江林
翼以湖北按察使領千人從攻湖口比於湘軍為最弱
及寇上陷漢陽率千八百人還援守便宜不入省城于
時布政使夏廷樾為總督所劾免 詔補林翼布政使
及巡撫殉城死而林翼遂署巡撫當是時江漢上下兩
岸寇充斥巡撫號令不出三十里屯金口倚水師自保
增募二千六百人合王國才等軍號六千而國才屯沌
口皆恃荆湘餉給軍軍無見糧寇亦易之不攻也楊霽

者以結交得朝貴懼假防北犯名屯德安號萬人糜餉自如四月楊需退走德安西安將軍扎拉芬來援戰死平林市西 詔奪需官以荊州將軍官文為總督五月壬戌朔授都統西凌阿欽差大臣攻德安官文泝漢至襄陽復乘礮船下漢居潛江天門間號北岸軍西凌阿久從僧格林沁軍無統御材力不能拔武漢惟水師屢克蔡店漢口及漢陽寇屯軍去旋陷林翼念相持無已時八月壬辰自將四千人渡江思合水師取漢陽不能進屯麥山戊戌寇至林翼督軍出士卒要餉出怨言強之戰未交綴諜而大奔林翼憤甚索馬欲赴敵死圍人

見巡撫意色惡反旋馬四五轉向空野乃鞭之馬馳不能止臨江乃遇鮑超船諸營官聞巡撫杜集潰卒調王國才合屯大軍山辛丑荊州運餉銀三萬至乃嚴汰疲羸奏調羅澤南軍令更增二千人還攻武漢於時水軍大將彭玉麟赴江西李孟羣改陸軍置副將楊載福為水軍總統屯嘉魚蒲圻間益選精銳倡勇敢其所用皆以披衿當礮石為樂巡撫禮下走卒偵事早還開營門自迎之羅澤南之杜江西也日轉戰其巡撫恭倨不恆急則倚之緩則厭之曾國藩亦自以客寄莫能為之主塔齊布薨江西事益疲澤南建議曰武漢者東南之樞

紐也形勢百倍於潯陽今兩城久為賊踞而崇通羣盜
出沒江西湖南緣邊驛騷欲制九江之命必由武漢而
下欲解武昌之圍必由崇通而入乃率所部及塔齊布
部將彭三元等道義甯取通城義甯崇通間寇雖號數
萬眾皆烏合脅附見湘軍輒敗走九月乙丑復通城甲
戌復崇陽林翼聞援軍深入躬往迎導眾議兵少不宜
先進林翼曰以難事諉客兵非也且廉恥安杜勝當戰
敗亦當戰己卯遣六營三千人鄉蒲圻而援寇自武昌
鄉義甯眾數萬適遇官軍軍敗寇復進敗湖南防軍於
羊樓澤南分兵爭羊樓而躬屯崇陽崇陽敗寇恃援復

還屯壕頭欲襲澤南軍澤南遣彭三元李杏春往攻之
癸未援寇自咸甯大至三元等軍少營陷乙酉德安寇
棄城南趨 詔奪西凌阿官官文兼代之官文先聞麥
山敗自沔陽還鍾祥至是移屯德安 詔詰責官文遷
延澤南失利令籌援兵會林翼等三面攻寇丙戌澤南
合軍拒寇於羊樓大破之十月癸巳蒲圻寇至又破之
癸卯林翼自嘉魚來勞師合澤南七營軍共十三營西
攻蒲圻寇聚三萬衆分五屯四柵作浮橋據白羊水以
通咸甯林翼用蒲圻舉人賀需若計出間道由公安畝
據城西北鐵山寇出不意盡失其險辛亥澤南精兵攻

城東林翼軍攻城西北且循水防遏以牽寇援寇踞城壘堅不出士卒仰攻多傷澤南令軍士積芻薪將燒其柵寇反以火器禦之火發寇驚奔破其五壘其夜官軍馮山鳴鼓角以驚城寇城寇遁走蒲圻復十一月庚申朔林翼澤南合兵東攻咸甯庚午咸甯復辛未水師克金口甲戌林翼等會水師於金口其日王國才進屯沌口乙酉澤南五營進屯洪山林翼將四營屯省城南五里墩城寇從高冠山望澤南築壘不出戰城外寇大壘八小壘二環四門見林翼軍至出拒戰澤南襲之破大壘一小壘二李孟羣軍亦薄攻漢陽水師往來江漢南

北每戰必捷而官文前軍攻漢陽者與南岸軍相聲援
都興阿將馬隊護水師水師夜燒寇船未還都興阿露
立達旦羣帥和輯戰士始奮矣

六年春正月江西寇患愈亟陷七府城議者交章請調
羅軍浙江湖南巡撫皆以為言文宗以武漢功可期
持不許言者益眾詔官文等通籌利害澤南念曾國
藩艱危義與同死生而垂成功不可棄日夜憂憤督戰
益急自正月至二月大勝數十小戰百數寇嬰城待援
士卒多傷官軍每戰輒薄城下寇陰穴城為突門三月
己未寇開城迎九江援黨澤南率師要之寇奔城追之

突門開直衝澤南軍軍不能退澤南躬拒之三退三進
軍幾潰火槍鐵子中澤南左額血霑衣猶踞坐指揮乃
得收軍還乙丑創發卒於軍軍中哀泣江西湖南聞之
皆歎息失氣詔以巡撫例贈卹而李績賓領其衆續
賓初建議分屯窯灣絕寇糧壘成自守之與洪山屯相
犄角既代澤南仍屯洪山以游兵巡窯灣塘角間寇守
益固而江西請師日數至義甯寇復犯崇通九江寇合
興國大冶土寇自武昌縣進至葛店謀襲巡撫大營林
翼以江西待援分軍四千一百人以劉騰鴻劉連捷等
將之曾國華總其事國華國藩弟也四月丁酉援軍遇

寇蒲圻乙卯戰於羊樓丙寅再戰皆破之劉騰鴻功最
騰鴻自此名顯五月詔責官文林翼遷延老師林翼
上奏言臣頓兵城下五月有餘日驅血肉之軀與礮石
為敵傷亡水陸軍三千餘人羅澤南及都司周得魁等
將弁百餘人李續賓乘馬中礮墮地者數矣夫兵易募
而將難求四月以後乃禁約仰攻分兵咸蒲以取義甯
四戰皆捷分水師以清下游直達九江臣自率五千人
扼武昌南路李續賓領六千三百人扼城東路分荆北
路水師六營下駐沙口水陸之賊援絕路窮下游九江
興國陸賊萬餘分道來援真可夾擊臣即豫撥三千餘

人戰於百里之外且臣歷觀前史李左車之告韓信尚
以頓兵城下情見勢絀為戒戰易攻難自昔已然矣臣
之才力何足言兵惟材有限而志無窮萬一變生他路
禍出意外臣亦不敢退怯苟且自取羞辱 詔報曰歷

述艱辛於事何益國體具杜亦應寓慎重於其中蓋自
是 文宗知林翼之為帥果有異於廬揚江南諸將而
林翼亦益感激發舒始有志於天下非僅規營湖北而
已五月唐訓方等敗九江援寇於葛店六月寇自樊口
增召戰船復犯葛店以蔣益澧總六營往逆戰破之追
奔至樊口合水師燒其船入武昌縣城遂渡江攻黃州

十日不能克益澧聞援寇踵至議回軍丁銳義爭之曰
夫兵勢宜遠料敵有方援賊之能已可見矣我屯黃州
則百里義民有所歸心賊之上犯有所牽制後路大營
相為聲援且能戰不杜近能守不杜遠今若旋師賊必
踵我踵我必戰戰此可乎諸將皆以縣軍為憂銳義乃
獨上書陳兵勢迥撫壯其議終以衆論檄軍還 詔果
以撤軍為非云益澧與續賓皆澤南弟子續賓名望曰
重嘗論事澤南前字益澧曰香泉欲何從益澧慍亦字
續賓曰迪安乃欲相統耶及續賓代將益澧屯魯港寇
大攻之請援中軍續賓報曰力不能相救守走唯公意

益澧大沮即升瞭樓撤其梯唯置旗鼓下令軍中曰賊勢盛吾死此矣諸軍欲走者自去衆驚愕相顧馮壘死守寇攻一日引去益澧於是告歸不待報而行七月官文遣舒興阿舒保等將馬隊四百人渡江援寇既上於青山魯港間增十三壘相持十六日水陸合擊破之馬隊追奔至葛店寇懼於馬乃大奔自是水陸馬步相輔軍勢日盛十月襄陽土寇起鎮道發兵討捕敗績以唐訓方舒保等往隨州土寇起以鮑超文明往軍至寇避湖北湘軍鋒銳甚乃益募陸軍五千水師十營增長圍困武昌十一月丙子寇開城遁走其日漢陽寇亦東走

丁丑李續賓等分三道追寇武昌縣水師馬隊追寇黃州江夏鄉民亦爭起要寇戊寅復武昌己卯復黃州庚辰復興國水師復蘄州民兵復蘄水十二月乙酉復廣濟壬辰李續賓率湘軍及巡撫軍九千五百人陳師九江城下都興阿楊載福合鮑超陸軍六千人屯北岸小池口自塔齊布羅澤南去後正二年而圍復合胡林翼知平寇之要不杜攻戰既克省城則奏蠲江夏等四十六州縣田糧以蘇民困復身帖開鹽釐以裕軍儲又上奏曰自古用武之地荆襄為南北關鍵而武漢其咽喉也武漢有警則鄰疆震驚南服均阻控制無術昔周室

征淮師出江漢晉武平吳久謀荆襄據扼長江惟鄂為
要四年之中武昌三陷漢陽四陷夫善鬥者必扼其吭
善兵者必審其勢今於武漢設立重鎮則水陸東征之
師恃武漢為根本大營有據險之勢軍士無反顧之虞
軍火米糧委輸不絕傷夷疾病休養得所是則平吳之
策必先杜保鄂明矣湖北之失杜漢陽無備下游小挫
賊遂長驅且東征之師孤軍下剿善戰者必傷久役者
必疲傷病之人留於軍中不但誤戰亦且誤餉若以武
漢之防兵更番迭代彌縫其闕則士氣常新軍行必利
請於省城設陸師八千人水師二千人日夜訓練本境

亂民隨時征討則我常處其安而不處其危矣湖北牧
令多不得人其已被擾者卅餘州縣元氣傷殘而良莠
不分其未被擾者卅餘州縣官讎民而民且讎官夫吏
治之不修兵禍之所由起也士氣之不振民心之所由
變也凡下與上交接之事諉之幕友官與民交接之事
諉之門丁夫州縣之所謂小事即百姓之大事也今日
之所謂小賊即異日之大賊也五年大熟州縣乃或報
灾經臣駁斥杜案六年大饑州縣轉不報灾經臣駁斥
杜案以豐為歉是病國計以歉為豐是害民生臣恐湖
北之民揭竿而起者不必學寇之再至而將盜弄於潢

池也地方吏治撫臣專責今欲嚴禁陋習與羣吏更始請皇上敕下部臣暫勿拘臣以文法資格行之數年或可改觀今或疑武漢兩城公私凋敝城周廿里設守為難臣以為蚡冒藍縷以啟山林衛文作都訓農通商是杜行之以儉而訓之以勤耳苟此而不能守去之他而何益或又以為武漢收復軍行貴速督撫將兵攻取為急則前者收復已二次矣况今江西七府俱淪於賊四年之冬僅失九江翁軼橫出可憂方大都興阿楊載福李續賓均已東下臣宜留鎮省城與督臣通籌全局整飭吏治 文宗嘉納焉方南北岸之分軍也督撫未

相見將吏各有所統頗構同異官文以將軍受任拘於滿漢論者復為林翼陳楊霈崇綸故事林翼歎曰師克杜和此何時哉既渡江見總督下令僚屬曰督撫相見前事冰釋敢再言北岸將吏長短者以造言論罪官文聞之大譴林翼又以鹽釐月三千金充督府公費兩人約為兄弟故軍政吏治皆林翼主臺官文畫行有言巡撫權重者一無所聽而巡撫亦謹事總督推美受過湖北富彊基於此

七年春正月襄陽土寇陷房竹山保康興山遂陷宜昌奏奪統兵鎮道及四縣文武官增遣巴揚阿合唐訓方

軍討捕二月曾國藩以父喪歸委軍事於福興文俊等
詔遣按察使李孟羣援廬州安徽羣寇窺羅田蘄州
黃梅廣濟蘄水謀絕九江官軍孟羣將二千五百人道
羅田擊英六霍山寇敗之遂克英山王國才屯黃梅進
攻宿松移鮑超防黃梅四月李景湖等敗於羅田景湖
戰死餘衆退保蘄小池口寇衆出攻官軍屯多隆阿大
破之燒寇壘二十一五月襄陽寇平李績賓作長壕三
十里塹九江城東南寇爭壕擊走之增募親軍千四百
人閏五月羅田寇深入犯廣濟十里鋪南及武穴鮑超
多隆阿等於十里鋪作大壘羣寇於蘄東北望天畝作

屯各相持伺隙斬東北官軍將領邢高魁等凡十營堅
勇不及超等林翼自出督師未至寇出斬水官軍敗還
屯巴河林翼至黃州汰衰羸選精銳圖再舉六月李孟
羣之師潰於霍山廣濟寇出大白湖背攻官軍王國才
移營失火被燒死李續賓渡江合攻湖寇屯破之多隆
阿鮑超等攻寇於黃梅西破其壘四十八七月庚寅舒
保等攻寇黃岡東敗之丁酉再戰於上巴河何紹彩李
續宜唐訓方等分三隊寇先攻左軍紹彩力戰續宜草
山卷旗鈔寇中紹彩軍不利將退顧見林翼立馬陳後
軍士皆驚喜踊躍赴戰訓方等亦鼓譟乘寇大破之平

壘四十四進軍斬水遂追寇及廣濟西寇走宿松太湖
八月癸亥遂克小池口林翼進至九江九月己卯朔還
武昌丙戌率續賓北渡江揚言攻宿松其夜更南渡伏
兵湖口北山是時外江內湖水師阻于一江楊載福彭
玉麟密期會攻梅家洲寇方依岫發礮拒水師聞山後
鼓角旌旗蔽山下則大潰續賓夜半射火城中寇大亂
空城走洲上寇亦走要擊盡斬之丙申進攻彭澤庚子
寇遯走復其城水師克小孤寇屯於是林翼以統帥難
其人懼軍出境而為福濟和春勝保所牽絀奏起復曾
國藩 詔林翼出境林翼奏以清釐漕糧為湖北大政

請留整理語杜籌餉篇

八年三月六安寇陷麻城舒保等將防兵屯商城聞麻城防兵敗退還增調鮑超何忠駿唐訓方等四月壬子李續賓地道攻九江城克之城寇被圍久以數千人嬰城種麥以為食其守愈暇頻傷攻城軍林翼駐武昌增募新軍更迭代歸將士千里如家庭援寇別道內犯其屯防皆良將能自立不牽綴圍軍圍軍反時往菊近助攻凡圍九江十五日寇壞散出城者水師扼之俘斬無遺論功李續賓第一續賓遂以能軍名天下戊午寇從光山犯陷黃安麻城官軍分應之丁卯續賓自將援黃

安五月丙子黃安復戊寅夜麻城寇遯走壬戌蘄防將
唐訓方丁銳義等破走太湖寇於界牌詔以安徽寇
事亟將合捻寇袁甲三勝保均號大帥兵力不足命續
賓助勝保唐訓方助甲三俄而閩浙寇並起議者至請
移和春往督師以續賓前授浙江布政使欲令赴本任
倚以平寇七月廬州陷李孟羣敗潰乃定議以續賓全
軍援廬州都興阿攻安慶起復曾國藩率江西湘軍援
閩八月林翼以母喪歸都興阿李續賓合攻太湖丁巳
克之進攻潛山癸酉克之乃分軍都興阿圍安慶續賓
攻桐城九月己卯克之戊子進攻舒城寇遯走續賓進

兵三十二日深入四五百里寇城壘望風潰破軍無留
行而都興阿率鮑超等軍礙安慶不能進羣寇又新破
江北大將德興阿陷六合殺翼長溫紹原渡江陷溧水
張國梁奔命勝保屯定遠日夕待援 朝廷憂皇專恃
續賓軍或議曰今久行軍疲屢勝則驕克城留屯不足
以為聲援不留軍則後路空虛且阻塞必敗之道也宜
還桐城合都軍攻安慶則水陸馬步相輔名將精卒咸
萃於百里之內功必可成續賓以受 恩深名重恥退
且念攻城非旬日期欲出奇壁廬州蹈寇瑕遂不用其
計而發書湖北請益師續賓弟續宜將四千餘人屯黃

岡唐訓方將三千人道英山援淮北未行林翼已持喪還葬官文得書笑曰李九所鄉無前今軍威已振何攻之不克豈少我哉徧示司道皆以續賓用兵如神無所用援續賓雖請援亦不肯留軍示怯悞則進三河三河距廬州五十里寇築大城環以九壘十月甲辰續賓悉兵十三營先攻九壘大戰皆破平之俘斬七千官軍傷亾過千人衆懼乃增調後軍未至寇帥陳玉成連江浦六合廬江衆又乞援捻寇招潁壽光州羣盜合十餘萬人日夜奔赴聲勢匈匈續賓遣輕兵迎擊於樊渡不利寇益進軍半潰辛亥合圍圍官軍三十重遠營數十里

將士狃勝聞敗先自亂續賓自搏戰不能進還營閉壘
門七營已先陷寇來如牆續賓歎曰今敗矣令軍中曰
見月照地而走皆束載而待月出續賓終恥於潰圍
謀復固守軍已動遂大奔續賓馳督戰軍不復成列遂
陷陳死曾國華何忠駿從之皆死國華從瑞州軍罷將
赴部選官聞續賓能留學戰未半載而及於難續賓既
死餘衆猶堅守丁銳義初領義中營營潰銳義突陳入
續賓大營集餘衆誓同死寇環攻三日夜水火俱盡營
破銳義死軍士死者數百人自餘營官皆走免五千人
盡潰潰者衝寇出與寇相擠行數里寇殊不覺連大衆

易亂而難整如此云潰軍至桐城桐城防軍俱奔寇乘
之前留防四城軍皆潰不旬日四城復陷都興阿等撤
圍退屯宿松起復胡林翼仍巡撫湖北十一月鮑超多
隆阿拒寇宿松東北大破之軍始振十二月壬寅朔林
翼受印武昌己酉出駐黃州壬子奏卹三河桐城死事
道員孫守信等及副將李存漢以下三百二十八人劾營
官敗軍者總兵以下八人其失律戴罪者懲責以差以
糧臺餉軍遲深自責請戶部主事閻敬銘來主之戊申
鮑超拒寇太湖北二郎河寇自此沮

九年二月都興阿請疾以多隆阿當前敵將馬步軍五

千立將疑學為大將合鮑超唐訓方軍萬五千李續宜屯黃州軍六千依林翼大營寇帥陳玉成還江浦捻寇散掠河南留太湖寇數萬相持不進是月李孟羣師潰廬州西孟羣陷寇中自盡死孟羣初起有名略既獨將頗貪多兵不問餉所出雖將萬人勢益孤弱軍中喜用方術士有族女號仙姑辟五兵後戰死湖北人頗神之及陷寇悲歌誓死尤為江淮所哀思三月寇帥石大開自江西犯湖南南界衆三十餘萬五月大發水陸軍援湖南凡萬二千人齎糧千里不煩湘餉六月援湘大將李續宜破寇寶慶解其城圍寇遂南走援軍還八月多

隆阿破寇石牌石牌當安慶西南寇作大城與太湖相倚官軍攻城潛山安慶寇分道來援馬隊要擊敗之冬十月大舉攻寇太湖增余際昌等九營助戰守奪潛山之天堂奏移曾國藩屯宿松林翼移駐蘄南視師太湖十二月移駐英山安徽寇知官軍名將銳意東下則大懼安慶寇帥自出城乞援陳玉成合捻寇號十餘萬勢張甚都興阿養疾荊州多隆阿新貴重諸將不樂出其下李續宜稱母疾留湘鄉曾國藩弟國荃新克景德至黃州留之領軍不可亦南歸鮑超復求去而多隆阿稱疾唐訓方等陳說軍事各殊異林翼憂之廢寢食內計

諸將獨多隆阿沈毅權宜出於一欲下檄令圍攻軍悉受其節制曾國藩懼軍事遂決裂力言其不可或又言天堂軍孤縣宜移屯林翼國藩一日一書相謀議久之不決與書多隆阿多隆阿輒不報林翼曰兵事喜一而惡二三屈我以申人今日是也天堂拊潛太背天險不可棄今地利已得破賊必矣徑上奏以所統軍悉統於多隆阿李續宜未至亦名隸之以風示鮑超諸軍大驚曾國藩得其咨文憂疑屢日多隆阿既為統帥遂撤太湖圍檄鮑超屯小池當前敵移將凝學軍為超後援已屯新倉更杜南國藩林翼危之業已聽多隆阿乃遂增

兵寇循潛山西太湖東傷山三十里連營百數丙辰遂
攻鮑超營丁巳多隆阿率凝學攻寇營以救超大戰傷
亡七百餘人破寇壘十三己未寇分番攻超裨將蘇文
彪段福壁守營礮丸中牀几至傷壁食以避礮丸六日
夜國藩盡發宿松屯兵九千人以圍太湖撤太湖圍軍
唐訓方三千人撥小池林翼益調麻城防兵以千人益
新倉以二千五百人合圍太湖國藩林翼又合兵二千
人防羅谿埠官軍後甲子多隆阿自督軍護鮑超運道
乙丑晦多隆阿以己軍入鮑超左軍屯令蘇廷彪軍出
休諸軍裹創扶傷勇氣百倍

十年春正月辛未多隆阿令唐訓方移屯鮑蔣兩軍間以己右軍屯鮑超左軍營旁而令蘇廷彪還屯列隊拒寇且曰急作壘右軍壘立成訓方軍築壘甫四尺寇已至訓方苦戰多隆阿堅壁不救半日訓方軍敗退屯新倉林翼先遣金國琛將五千五百人合余際昌軍為九千人出天堂謀夾擊所謂山內之軍也自除夕入山險冒冰雪行十日乙亥至高橫領望官軍寇屯皆杜目中寇來攻敗去丁丑多隆阿益千人屯小池己卯復益五百人國藩益三千五百人屯新倉兩三日山內軍鳴角發礮山外軍亦鳴角發礮應之寇乘霧移屯近太湖辛

卯多隆阿將五千人鮑超三千人唐訓方三千五百人
蔣凝學四千人朱品隆三千五百人列陳攻寇小勝壬
辰平旦分三道東攻小池西攻羅山中攻東堰東堰者
寇屯也而陳玉成精兵據羅山既合戰多隆阿併西中
軍自將攻山間寇亦大出衆當之馬軍突而前寇少卻
小池寇分四道鈔官軍鮑超唐訓方合擊先敗之遂合
軍燒寇營東南風大急燎及山脅寇棄屯走二十里軍
械委積燒屯館柵壘數百俘寇三百人斬賊以萬數其
夜太湖寇遯走甲午潛山寇遯走於是論功休士林翼
曰潛山知縣葉兆蘭結民兵立五營為官軍轉運使天

堂屯軍得自固功第一免論失守罪并超擢兩階奏獎
安徽宿松等四縣民團二月分蕭翰慶等六千人援浙
江未至杭州陷閏三月江南大軍潰退四月蘇州陷
詔曾國藩署兩江總督分鮑超等兵萬人屯祁門起都
興阿將江北軍分兵千人李續宜曾國荃既至軍乃復
進國荃領萬人圍安慶多隆阿領萬人攻桐城續宜領
萬人屯青草壩游擊應援七月戊申多隆阿攻桐城西
北不克寇倚桐城牽安慶又知官軍精銳杜桐城設守
甚固城西北求雨領勢臨城寇作石壘環以二丈石壕
與甌壘水堡相輔己酉多隆阿躬率三千人出領後陽

列騎兵攻城夜半領後軍聞登寇馮壘自以官軍不能
近雖據領上無益未之備也多隆阿令二千人合築礮
臺三比曉臺成瞰寇城壘杜目中寇驚以為神功辛亥
列隊移礮置三臺於是石壘及城寇俱伏匿知困矣十
月甲戌寇援桐城號十萬多隆阿先屯掛車待之寇師
隙玉成增壘不戰多隆阿曰賊始至而閉壁此欲老我
師也然以援城為名而不能戰寇衆心不能知其機而
形勢已餒矣宜悉衆合擊之破其一屯餘衆自走癸未
建旗鼓率十八營分三隊薄攻之寇出戰敗還屯多隆
阿喜曰賊將走矣飛書告李續宜約夾擊時寇勢猶盛

癸未之戰斬八十人且續宜軍屯新安渡寇又不凶丙戌突攻續宜多隆阿親往援之寇復自退丁亥多隆阿謂續宜曰賊易與昨戰可知也請與共殲之戊子分軍自挂車掠寇屯而北續宜自新安渡掠屯而南寇不能守則出戰兩軍奮擊之俘千三百人拔出難民萬四千平壘館百四十追奔二十餘里玉成走廬江李續宜回援未至乙丑寇陷蘄水丙寅陷黃州分圍麻城掠黃安孝感黃陂武昌大震李續宜舒保等渡江拒之寇上掠雲夢德安隨三月寇分踞漢南悉精銳趣蘄廣濟還宿松辛丑寇至太湖多隆阿遣軍嘗之戰不利衆曰急發

大軍拒之多隆阿曰賊新勝氣銳其來不攻我而亟戰
 以怒之敗矣令皆還保大營寇亦疾趨入安慶丙午多
 隆阿移軍集賢關壬子謀言拔寇復至挂車還屯高河
 甲寅寇自挂車列隊耀兵而退多隆阿曰此示假道不
 欲戰也然彼畏我甚宜示弱以誘之設伏兩山隘戒之
 曰賊敗必過東東起大呼西起應之過西東亦如之勿
 遮道勿留行令突騎數百躡賊曰聞呼聲而進追不得
 過十里乙卯親率羸軍誘寇寇進則走寇分二隊以大
 衆攻大營以少半追敗者至新安渡伏發斷寇後退者
 還擊之寇潰而東東山伏鼓而呼西山應之東西呼聲

動天地追騎馳至寇大敗爭走攻大營者亦收衆退皆
走廬江胡林翼以李續宜軍弱奏增調駱秉章援蜀軍
自安陸屯隨續宜屯澠口進攻德安四月陳玉成窺青
草場空虛以為桐城軍不能遠戰復分三道來侵多隆
阿分五隊拒破之 詔多隆阿以副都統幫辦官文軍
務曾國藩自徽州移屯東流五月江西寇犯崇通西南
懋屯軍潰遂陷興國林翼時疾病歐血強起還省城李
續宜亦移屯城外於是江南咸甯蒲圻崇陽通城大冶
武昌皆陷湖南軍北援寇還江西六月丙戌晦寇自蘄
出太湖七月庚寅東犯潛山連屯五十里以逼桐城多

隆阿曰安慶寇危急今不急救而致死於我此所謂聲
東擊西者也我能勝之則安慶自破何為而使賊必戰
即稱疾三日不出寇來攻出擊者輒敗還丁酉寇乃引
衆攻大營多隆阿自起擊之寇頻與多隆阿戰識其旗
及戰鋒銳甚後者悔其輕進稍稍引退衆乃大奔猶屯
高河相持安慶之圍也林翼計曰用兵之道全軍為上
得地次之今日戰功破賊為大復城鎮為下古之圍者
必四面無敵又兵法十則圍之若我兵困於一隅賊必
以弱者居守而弱軼橫擾乘我於不及之地此危道也
然不圍城則無以致賊而求戰故分三軍一軍圍兩軍

戰寇知不可敗則間道上犯李績宜信用失人偵候不
明反張虛詞以惑績宜南北馳驅不見一寇寇既得德
安則以為圍攻二軍搖乃南還哨馬繞太湖城以撼大
營林翼居城中不動或諫曰湖北巡撫何為而入鄰懸
林翼曰帥府所杜即官守也此潛山太湖二城百戰得
之吾居守一二年猶不患寇寇亦竟不至林翼既還鎮
陳玉成復自英山繞宿松攻太湖屯軍登城設守三日
而寇退丁酉舒保等克德安八月丁巳朔曾國荃克安
慶語杜曾軍後篇胡林翼病益甚奏以李績宜自代戊
辰 詔報可辛巳 詔曰安慶陷九載楚軍合圍胡林

翼畫策督剿攻克堅城厥功甚偉加太子太保銜給騎
都尉世職其日林翼薨多隆阿聞安慶克策桐城寇必
走留軍收城自要寇宿松先一日至寇方從潛山西趨
遇官軍驚走黃梅馬步追奔四百餘里廣濟斬黃次弟
盡復聞林翼之薨回屯挂車湖北平

湖北篇第三

江西篇第四

湘軍志四

水軍興而寇不得志於江漢則北出潛太南掠皖南以窺江西寇徒多南人樂南侵故江西尤受其禍曾國藩自九江移屯南康思整軍出江謀進取非為江西戰守也然寇已由都昌攻饒州別由東流建德窺樂平屯景德鎮東犯柘門休甯咸豐五年二月國藩奏言以湖北安徽江西三省論之攻寇之道水路一而陸路四自漢黃蘄瀕江至望江為外一路自蘄水達宿松為內一路自九江上興國崇通武甯為西一路自湖口下至徽甯為東一路四路當四軍而臣祇一軍分則立弱欲不分

則事勢迫之今東路已告急矣塔齊布留五千人圍九江羅澤南以三千人攻饒州臣獨與內湖水軍相依寇衆我寡所憂方大三月寇陷弋陽羅澤南攻克之寇還破興安踞廣信澤南至一戰大捷三日城復寇走玉山江西軍因收饒州五月崇通寇犯義甯知州葉濟英城守江西軍往援敗沒糧儲道鄧仁堃議江西民多畏寇不肯治圍守奸人反因寇為利潛相導引所至輒陷唯義甯倡義扞寇官民同心功節彌厲且葉牧嘗振湘軍達援省城為西屏蔽宜悉力赴援以風示列城今省軍無可遣唯羅軍可用巡撫以澤南客軍當還攻九江又

與曾不相能不肖言用客軍固請乃許然中止者數濟
英守十九日城陷死之士民殉者千數省城震動乃遣
澤南七月軍至梁口遇寇敗之寇悉眾踞杭口澤南取
間道據鰲頭連營城西北諸山寇分兩翼仰攻敗走明
日登山望城中謀攻取城寇懼官軍得形便遽出爭山
官軍馳下擊之寇大敗遂棄城走丙子義甯復戊寅塔
齊布薨於九江澤南還南康八月攻湖口不能破上書
請率所部西援武昌國藩念攻堅老我師且塔齊布杜
時九江猶不下今獨一澤南宜置之用武之地因聽其
計更遣塔齊布舊將彭三元等從行合五千人彭三元

者敢戰名一軍塔齊布薨軍中皆以三元當代將而周鳳山起行伍治軍號為有條理三元徒勇故鳳山得統大眾竟僨軍事三元從羅軍亦敗死崇陽語杜湖北篇澤南既去水師無陸軍相輔以幙客李元度募平江人三千屯湖口十月澤南軍復蒲圻鼓而北行寇乘虛復入義甯敗江西官軍遂陷新昌瑞州廣東土寇出湖南入安福陷臨江合瑞州寇陷袁州江西湖南阻絕軍勢不能振江西水陸軍徒名具耳十一月周鳳山解九江圍援臨江寇分黨圍吉安知府周玉衡以先禦土寇功擢按察使未上留治城守與署知府陳宗元同登陴屢

敗寇鄧仁堃言於巡撫曰義甯可鑒也請先援吉安議者以寇蔓延宜先防省城扼章樹鎮國藩恐縣軍深入不利而巡撫貪倚湘軍則亦推以曾公意不欲不敢言調遣仁堃用司道公文露移鳳山揚言移軍往援吉安聊以固城守心而與書鳳山令自請遂不果行竟屯章樹焉

六年正月吉安守經七十日寇勢愈盛甲申城破周玉衡及文武繁吏死者四十一人自寇破諸名城唯湖北省官皆死其位吉安一府城堅守久於武昌府縣學汎屬官委員殉城尤烈士民從義者比於義甯聞者莫不

痛惜頗咎周鳳山湘軍奪氣矣二月章樹軍潰寇以數十人追鳳山大奔不能止走南昌寇進陷進賢東鄉安仁破撫州於是論者言周鳳山非將才援吉安亦敗或曰鳳山早入吉安馮城守得周玉衡左右之可皆不敗及敗湘軍無大將乃令李元度自湖口移屯撫州別遣鄧仁堃子輔綸及前平江令林源恩募新軍皆用平江人號元度所將為楚軍輔綸等所將為江軍是時仁堃方專省局欲倚以致餉而林源恩習平江防戰曾有功雅善李元度故委權此三人未幾建昌南康相繼陷國藩移駐省城以戰船為行臺彭玉麟將內湖水軍屯吳

城三月羅澤南卒於武昌湖南援軍將劉長佑收萍鄉
蕭啟江復萬載胡林翼分軍四千遣劉騰鴻將之以國
藩弟國華主其軍道義甯收新昌上高五月畢金科將
千人防饒州黃虎臣將三千五百人攻建昌六月饒州
陷畢金科還南昌益師攻克之黃虎臣攻建昌輕出遇
寇戰死所部軍移屯撫州七月劉騰鴻軍至瑞州國藩
遣親兵四千人往會師寇避援軍攻新軍新軍敗騰鴻
馳救寇退走是時江西列縣陷寇者四十餘城 朝命
廣東閩浙合援而江西司道亦各私立軍赴急學政廉
兆綸居河口得專饒信軍事頗警巡撫文俊禱用將領

營軍名號繇多而雅善布政使者齡以耆齡忌鄧仁堃
因言臬司子不宜將 詔下其章於曾國藩文俊因罷
鄧輔綸悉以軍屬林源恩合李元度軍持寇撫州廣東
和平土寇犯定安安遠信豐長甯上猶崇義寧都省城
不能救軍報數月不相聞八月甯都土寇襲陷建昌遂
陷鉛山貴溪圍廣信知府沈葆楨從學政督餉河口聞
警還城居民蚤散走葆楨嬰空城與省軍阻絕飛書玉
山告急於浙將浙將饒廷選故葆楨舅林則徐部軍有
兵二千人以則徐舊恩倍道赴之廷選軍無部伍唯裨
將畢定邦賴高翔頗敢戰其行軍不齎糧止不為屯故

於赴急易至廣信之明日寇亦至以城有備圍五日而去江西恃饒信通鑑貨為餉原聞廣信能守則以為奇功湘軍久無功則益絀九月國藩躬視師瑞州李元度以撫州不克餉益乏乃分軍略弋縣欲募糧饋且分寇勢戊午收宜黃癸亥收崇仁是日城寇出攻江軍營官耿光宣中礮死援寇偵官軍勢弱日夜從流坊增眾襲江軍屯因縱火燒民居延及營帳林源恩杖劍叱奔者不能止軍潰源恩死元度突圍免圍撫州軍俱潰移元度屯貴溪十月寇復陷宜黃崇仁分陷金谿福建援軍將張從龍圍建昌軍潰副將陳上國戰死時特詔起

用黃冕知吉安府冕請率軍往以國藩弟國荃為軍主
湖南巡撫別用周鳳山領一軍軍餉悉自募合六千人
又別遣援軍水陸二千一百人自長沙向吉安而贛州
南安知府汪報閏周汝筠等率自募土丁禦寇計畝徵
稅號曰田勇亦頗有廣東援軍田勇多至數萬皆不能
戰當是時江西分為四院司羣官居南昌一城以軍事
聽諸將巡撫唯主其奏報馬袁州吉安瑞州則皆湘軍
而瑞州軍最強李元度屯貴溪防廣信畢金科屯饒州
金科兵最少戰最力曾國藩居水軍中江西諸軍偏伍
彌縫不能有大損益然劉于涇以水軍起純用江西丁

勇段起鍾世楨樊俊等以湘人襍用江湘軍亦頗有名
劉長佑屯袁州踰八月十一日甲申朔寇將李能通啟
西門納官軍袁州復江西諸軍稍振矣丁卯曾國荃收
安福丙子湖北軍克武昌漢陽水軍乘勝至九江十二
月國藩至九江勞軍丙戌段起收建昌縣己丑湖北軍
進收瑞昌德安辛卯劉長佑進收新喻丙午湖南援軍
將劉拔元胡兼善收永甯永新蓮花廳崇義上猶
七年正月丙午瑞州圍軍將普承堯吳坤修別攻奉新
克之曾國藩至瑞州勞軍因督攻城乙卯畢金科攻寇
景德鎮丁巳遇伏死之金科臨沅人本從王國才以勇

見知於塔齊布將千人久屯饒州列將多忌其能讒妒
之餉不時得金科益不與諸文吏相結納獨倚曾國藩
而國藩不主諸軍餉歲暮益困先是西安將軍福興將
江南大營軍千人至饒信督軍與湘將尤阻格金科軍
乏食問計府縣或謬謂金科能克景德餉可得也金科
輕軍遽往寇屯市後金科率十人間行突入寇屯寇驚
起圍之殺七人三人者傷金科所當輒顛仆踐血出走
寇死者數十憤且恥聚火器環燒之死金科之戰也負
槍腰弓挾五十矢二卒前持丈二矛八尺刀怒馬突陳
寇莫敢拒亦以輕敵故每獨勝輒無功陵侮諸將不肖

與他軍合省城委以東防漫不為之繼及其死饒防諸軍皆潰寇掠弋陽陷鉛山饒信駭然矣二月曾國藩父喪委軍徑還湘鄉聞者以其不俟命懼嚴譴文宗先得湖南奏則給假令歸治喪比國藩奏上朝命已下於是天下知天子使臣以禮莫不感奮焉國藩既去福興至瑞州視師諸將汎以客帥遇待之福興還南昌因上奏請徵兵頗言勇丁不可用三月撫建寇東窺福建陷光澤邵武張從龍等敗退詔奪官治罪並罷文俊以耆齡代之胡林翼遣李續宜來瑞州代曾國華劉長佑攻臨江不利退屯新喻袁州三縣民以長佑師

不擾爭率丁壯助軍軍復振四月湖南軍自桂東進攻龍泉劉拔元戰死胡兼善兼領其軍以袁州敗益遣王珍將三千人助長佑長佑已大破寇進圍臨江珍移軍吉安破援寇於水東閏五月胡兼善獲逃寇林預信誘降龍泉偽官復其城周鳳山屯吉安謬上為已功詔下駱秉章秉章因劾鳳山事下耆齡未幾鳳山軍潰事罷不問六月胡林翼以寇犯蘄水檄李續宜還黃州起曾國荃復領吉安軍甯都寇援吉安王珍逆戰破之追奔至廣昌分軍收樂安丙寅吉安寇攻周鳳山屯軍士揚言餉匱不戰而走趙煥聯等軍從之皆潰退屯安福

曾國荃收眾並退以乏軍奪黃冕官冕言鳳山軍餉不由己且餉多於諸軍二月福興檄鳳山還南昌調浙將李定太合攻進賢黃冕請疾歸國荃專吉安軍事劉騰鴻之圍瑞州也頻破援寇嘗以三百人敗萬眾作長壕以困城中圍攻一年所役作壕壘如數萬人之功城寇知死乃突圍力戰七月庚辰朔騰鴻攻城中礮傷明日更戰軍士知騰鴻志必克爭致死盡破臺壘礮凡雨下中騰鴻脅仆弟騰鶴扶之強視語曰城不下無斂我軍中皆泣冒礮登城斬殺強寇大半除道開門迎騰鴻尸入治喪間見者莫不悲壯其志以為騰鴻能用眾也騰

鴻於諸將位最卑名最重求所為戰略無以異人至於攻城以力求必克非將帥之道然臨死一言而使士卒忘身殉己若報私忿以成其志雖塔齊布多隆阿莫能逮騰鴻死而所部稱精兵至今聞其名凡曾從騰鴻戰者皆服其勇杜湖南諸將中名欲過李續賓矣乙酉江西軍將鍾世楨敗於進賢丁亥寇自撫州犯崇仁趨樂安王珍拒破之壬辰李定太收進賢撫州寇分犯徽州畢大鈺戰死婺源八月王珍卒於樂安以張運蘭王開化分領其軍珍之將善以少擊衆專己自喜故初起所至齟齬獨左宗棠奇之恆留湖南擊土寇曾國藩歸乃

遣援江西羣寇蛾聚聞珍至輒走諸軍將與珍合屯者皆推其能然珍部下無名將張運蘭等克為深毅於湘軍為別派差近李續宜異乎羅澤南劉騰鴻云臨江援寇敗普承堯於峽江南援軍將楊虎臣屯新喻張運蘭等屯分宜未進援寇趨太平墟窺圍軍城寇皆填壕伺夾擊劉長佑留軍守壕自拒援寇江忠義蕭啟江等突陳大破寇燒其屯四十七九月丙戌李續賓合水軍克湖口彭玉麟出江克小孤景德寇合安仁金谿瀘溪土寇犯貴溪李元度拒戰不利還城固守十四日寇退趨東鄉李定太周鳳山禦之壘未成寇襲破鳳山屯殺

虎營軍主帥遠燁遠燁名家子早入翰林祖父承瀛為
浙江巡撫還葬時殯供甚盛及寇亂黃梅姦人發其墓
遠燁發憤思復讎走謁曾國藩國藩以憂歸遂游軍中
時湘軍樸魯凡京朝官從軍者皆帕首腰刀習勞苦無
敢鮮衣美食而遠燁雍容文儒輿服都麗雖強自刻厲
趨蹌言論燁如也見者傾慕皆歎曰衣冠中自有人且
勸遠燁宜居幕府遠燁奮欲自將又以前上封事歷詆
軍機封疆大臣大臣切齒非立奇功不足自表異乃募
千人自效倚鳳山老將與合屯及寇至鳳山先走新軍
見前屯破則大潰遠燁一出而軍覆身死鳳山三僨軍

三奪官江西終莫能罷其軍寇遂犯進賢復自崇仁出
豐城鄱陽寇出彭澤謀牽臨江九江軍兩城圍已合寇
不能進十二月乙卯克臨江劉長佑以疾歸劉坤一代
領其軍蕭啟江自率所部為統將仍與坤一會攻撫州
豐城寇南趨吉水張運蘭等拒之寇還峽江

八年二月臨江餘寇合撫州眾東趨廣豐福興自河口
退駐廣信建昌寇分黨入邵武建甯胡林翼奏劾福興
請以李元度防浙邊 詔遣李定太而仍留李元度屯
貴溪湖南增軍助圍吉安三月壬午蕭啟江劉坤一王
開化合軍收崇仁甲午啟江進軍上頓渡戊戌建昌寇

援撫州坤一迎戰破之四月壬子李績嘗克九江甲寅
南豐寇棄城走王開化分軍屯南豐寇復還合廣昌土
寇來攻城王文瑞拒走之壬戌啟江合江軍水師將劉
于瀆設間謀約內應丁卯復撫州丁卯建昌城寇出走
王開化張運關合軍要之寇走新城己巳復建昌撫建
寇多烏合土寇散處鄉野官軍進輒鈔擊然無精勁故
諸軍大集輒遜悉由廣豐犯衢州進陷處州福興屯衢
閩浙軍近三萬莫能拒守詔遣運蘭等援浙五月起
曾國藩督浙江軍六月召福興還京師留劉長佑軍屯
防江西以張運蘭蕭啟江軍從援浙閩國藩之歸也中

外交章言宜起復國藩奏謝因言督師權輕於督撫州縣慢不奉令餽餉不繼而軍將為人侮辱安徽浙江巡撫乃故詰問所刻關防或先謬題欽差大臣乃移文正其名以相窘謔故久居江西無所補益及去江西而八府城次第皆復以湖南援師軍餉自巡撫一人出故也軍興欲避敗莫若將一軍欲成事則必兼督撫湖南北效可睹矣然始勅義師由國藩軍將視為轉移福興等徵調置不訾省得國藩一紙千里赴急胡林翼初從國藩及其得位行意欲倚國藩定兩江頻奏訴其屈文宗重奪情未遽強起之也浙事亟乃詔遣督軍而兩

湖江西爭願供其軍餉時國藩久謝事無舊軍諸名將
後出率皆起羅王部曲獨水軍猶隸彭楊而楊載福已
提督官品高於國藩由是負沈滯重望亦鬱鬱不自得
更欲以和輯收眾心頗悔前者所為是時駱秉章委事
左宗棠湖南諸將伺宗棠喜怒為輕重胡林翼治湖北
軍餉最稱富強者齡嘗嚴事國藩又以其當往浙閩無
偏處嫌視文俊陳啟邁時禮敬有加三省一家號為大
和七月胡林翼以母喪歸劉長佑移屯建昌八月國藩
自湖北入九江至湖口徵軍萬二千其將名者張運蘭
蕭啟江朱品隆吳國佐時浙江已解嚴寇屯崇安連營

及建甯邵武分黨還攻廣豐玉山李元度守玉山分軍
援廣豐寇走德興元度獨將一營從國藩而悉以平江
軍隸沈葆楨邵武寇復出瀘溪劉長佑戰不利遂陷金
谿安仁張運蘭尾之收安仁吳國佐新出銳欲攻寇與
運蘭期合戰先入被襲軍敗劉本傑陷寇死本傑久佐
王珍軍負時名以不能騎為追寇所殺運蘭失期故不
敗寇亦略新城東走而劉長佑北攻金谿寇大破之寇
悉走福建邊國藩移屯建昌吉安寇東犯宜黃將悉趨
邵武曾國荃等乃作浮橋水陸合圍寇結大筏衝橋屢
斷輒續之寇懼頗有降者方寇之起以輕軍剽駭為利

及石大開出始脅大眾所至踞守姦愚民多從之大開
怯戰而寇黨新附不自固見圍則又悔懼思反正袁臨
既以誘撫克定吉安民亦潛通官軍寇將亦奉大開令
期會福建乘贛水駕小舟繫大筏順流遯走餘衆潰散
戊午夜收吉安江西列城皆復十月劉長佑軍疾疫移
屯撫州疫甚還湖南散遣羸病因留募新軍張運蘭進
軍邵武寇復還江西南掠信豐北犯景德李績賓覆軍
廬州官文急奏國藩自助十一月寇自信豐犯南安國
藩奏言今臣當援皖而江西寇東南斜距千餘里勢不
能合并分遣蕭啟江援贛南以張運蘭吳國佐攻景德

吉安軍將朱品隆等為親軍從屯建昌寇踞景德牽大軍議者言宜急擊吳國佐者左宗棠所拔用以童生領軍奏敘主簿張運蘭積功至道員湘軍法管官不相統者無階級皆平等統將雖九品官其管哨官至一二品階聽命唯謹運蘭號為大人國佐部曲亦號國佐為大人以敵之國佐喜言兵運蘭拙訥然自命宿將積不相能又用金谿失期事相怨望而國藩欲其互相濟固命同往十二月庚申合攻景德王文瑞吳國佐當中路張運蘭分左右繼進文瑞等接戰寇退走運蘭復失期寇見無繼還鈔官軍國佐禦之寇遂直前攻文瑞復分鈔

其右文瑞國佐戰且退死者百五十四人於是國佐上書求退文瑞亦不直運蘭已已運蘭獨攻寇寇伏無聲久之白旗數十騎臨水欲渡促擊之皆還走竟不出戰日暮運蘭收衆寇吹角出大衆乘之運蘭反旆渡水文瑞揮衆繼進寇敗去保景德罷國佐軍還湖南運蘭自此專景德戰事其後朱品隆唐義訓李榕諸軍皆以持重不戰全軍為上及李續宜諸部將成大吉毛有銘等專求自全湘軍鋒銳始頓矣劉騰鶴等自吉安移屯九江以應湖北

九年正月蕭啟江至贛州寇屯新城墟衆號數萬己丑

啟江遣田勇三千誘之寇爭出赴利啟江揮軍推鋒直
進大敗之明日寇出疆眾數千啟江分軍迭戰又敗之
毀其屯辛卯寇設伏誘田勇田勇貪鹵獲倚湘軍無所
畏集者四萬啟江曰眾而不整必敗禁之不可遇伏果
敗蹂湘軍人相間廁湘軍敗胡中和等力戰斷後死者
二百六十四人癸巳啟江復獨挑戰寇不出辛丑官軍
遂至城下南安故有二城夾水寇分屯相倚軍至皆棄
而走啟江約軍屯城外作壘自固令曰入城者斬二月
壬寅朔寇果還南城癸卯攻之寇敗走啟江喜曰寇狡
而弱吾直驅之耳遂入城城寇亦走乘勝攻信豐辛亥

寇悉走趨郴桂閩浙餘寇皆趨郴桂所謂石大開三十萬眾後圍寶慶者也安徽寇自婺源走建德窺彭澤劉騰鶴拒戰辛酉敗之玉虹橋已已進攻建德寇礮中火藥軍驚潰騰鶴死之國藩移屯撫州增遣撫州屯將屈蟠戍湖口益募三千五百人裨朱品隆更以張岳齡凌蔭廷為營官調玉山防軍助攻景德而檄蕭啟江自吉安還援湖南五月曾國荃至軍率朱品隆等軍五千八百人助張運蘭景德軍相持七月寇久益懈水陸二萬人莫肯先進國荃至乃令移屯敗援寇於浮梁南六月大雨水軍將任星元合劉于瀆乘水進燒寇屯寇走浮

梁國荃等追之癸丑復浮梁寇走建德北去江西少定
乃遣張運蘭還湖南援寶慶國藩帥諸軍出九江八月
至黃州九月議合湖北軍攻安慶寇併力於湖北軍而
石大開潰於寶慶狂走廣西益西去明年寇陷蘇杭國
藩督兩江以江西為根本其疆弱輕重與初敗九江時
絕殊語杜後篇

江西篇第四

曾軍後篇第五

湘軍志五

咸豐九年秋江西湖南寇漸平湖北巡撫胡林翼方治軍儲餉以平寇為己任而寇帥石大開由貴州窺四川湖北餉倚川鹽四川又饒富獨未被兵議者皆以防蜀為言且以曾國藩久治軍無疆寄為未竟其用林翼頻說官文合奏請 詔國藩援蜀冀 朝命授以總督詔唯令督軍無後命林翼又議客軍孤縣愈非計安徽寇合捻寇蔓廬壽將為楚患乃改議留國藩合謀皖分三道各萬人都興阿楊載福循江攻安慶國藩出太湖取桐城林翼自英山鄉舒六袁甲三時屯臨淮間之以

為今楚軍大舉而安徽兵弱將驅寇北犯宜由光山北
遶蒙城具奏以聞 詔官文國藩林翼計萬全謀定而
後動國藩上議曰竊號之賊與流賊異今之洪秀全踞
金陵陳玉成踞安慶私立正朔偽稱侯王竊號之賊也
石大開由浙而閩而江西湖南廣西貴州流賊類也龔
張諸捻分合無定亦流賊也流賊當豫防以待其至堅
守以挫其銳竊號者當翦除枝葉攻所必救自洪楊內
亂凶燄久衰徒以陳玉成往來江北句結羣捻故皖北
糜爛日廣江南賊糧不絕臣等以為廓清諸路必先攻
金陵攻金陵必先屯滁和取滁和必先圍安慶誠能圍

安慶攻廬州略取旁縣使其備多力分何敢北竄哉且不特不敢北而已並不敢東顧江浦六合蓋竊號之賊未有不竭死力以護其本根者也中原腹地莫要於皖固不敢謂石大開必無入蜀之虞而就大局論緩急臣自宜回軍援皖以速蘇民困十一月國藩移屯宿松是時蕭啟江援四川張運蘭還湖南獨朱品隆唐義訓易開俊張岳齡等從而湖北大將都興阿養疾荊州李續宜告歸湘鄉多隆阿鮑超新貴重皆樂為林翼用憚國藩嚴國藩亦不樂二將皆推林翼節度悉湖北軍圍攻太湖十二月多隆阿又撤太湖圍屯小池拒援寇援寇

號十萬潛山太湖寇踞城者號數萬軍事危險多隆阿
意氣自如國藩憂之乃悉發已親軍圍太湖語杜湖北
篇

十年正月壬辰湖北軍大破寇遂克太湖潛山二月寇
陷杭州三月杭州寇退李續宜至宿松定議分三道圖
安慶乃遣朱品隆等進屯集賢關多隆阿進規桐城而
續宜為後援以助二軍閏三月曾國荃來領安慶軍江
南大營軍潰四月蘇州陷 詔加國藩兵部尚書銜署
兩江總督胡林翼喜國藩得大用與書曰兵事當布遠
勢忌近謀公言南岸分兵一由池州取蕪湖一由祁門

出徽甯一專守廣信防江西此皆內軍也取餉江西而
惟議釐捐以錢漕歸巡撫愚又以為隘矣以湖南北為
兵之本以江西為籌餉之本待三省協防而後謀吳非
一年不能夫吳越人之毀譽怨望雖不必問而吾等悲
閔之懷與吳越人仰望之苦最難為情也吳督之任以
包擊把持恢廓宏遠為用鹽漕得人何事不濟不患貧
也蘇常失守以後督撫監司或死或未死或已補或未
補進賢退不肖此其時矣今宜起兩軍一出杭州一出
揚淮先調屯守之平江軍五千馳入杭州拯其急而取
其財而令次青募五千人繼進拘守廣信無當也杭州

失馬衢州杭州存進湖州此平吳之先著已霞仙季高
當各募六千人為皖南揚州之用或為江西之用為隨
征之用少泉可治淮上之師合水陸萬五六千人而以
多都將馬隊幼丹宜奏為西藩二李或甯藩蘇藩則兵
餉一家矣大局安危視公放膽否耳近者葉督兩廣而
不知廣西為何人所轄何督兩江而割皖南割皖北并
割江北矣福為皖撫而割南岸棄以予浙江又割淮北
棄以予袁公其日蹙百里宜也徽甯猶完布置粗定當
鼓行而前與懷桐之師會於當塗然後湖州軍出於蘇
常揚州之馬飲於江浦林翼雖孱弱不覺其言之汗漫

也急服緩受大題小作則恐或不濟國藩得書壯之然其再出也行兵持重必無後顧而後動謹官守和衆心以懲補前失不能用其議將進甯國猶惡其險乃移駐祁門乞鮑超全軍以行而自將朱品隆張運蘭合萬一千人五月戊申渡江六月癸酉至祁門檄李元度募軍三千左宗棠已奉 詔襄辦則令領五千人鮑超方還夔而張運蘭杜柳俱期八月會兵丙戌 詔國藩補兩江總督授為欽差大臣時曾國荃留圍安慶與多隆阿李續宜皆為湖北軍袁甲三屯淮上自為一軍巴棟阿為鎮江軍李若珠為揚州水軍王夢齡署漕督為清淮

軍薛煥署總督為上海軍張玉良收潰軍退杭州猶稱江南大營軍周天受屯甯國張芾屯徽州為二軍江長貴將杭州軍米興朝防廣德皆王有齡主之為浙江軍皆各專奏不相咨稟寇踞蘇州則東犯松江西陷金壇南破嘉興杭軍退敗而高瀆寇復南出廣德池州寇東掠旌德涇蘇杭人皆謂國藩宜援杭湖論者或以為輕騎至淮揚則不制於寇而業已至祁門則又以為宜急據甯國當前敵遣左宗棠等攻廣德指南陵合陳大富軍與楊載福水軍相連待安慶克而合師國藩歎曰夫言之甚易行之甚難今進無所往勝無所益何為而輕

舉乎八月 召張芾還以國藩兼督皖南軍令周天受
聽調遣戊辰甯國陷天受死壬申以李元度為皖南道
將三千人屯徽州張芾軍萬人分防諸隘實不任戰守
軍餉久乏倉卒遣散以索餉襍居城中國藩先議守徽
使朱品隆覘地形品隆言非精兵二萬不能守而元度
前守貴溪有功自許能守之國藩又以元度新軍不能
野戰故浙江請援不赴俾馮城以自固元度至三日土
寇散軍結連甯國寇而旌德寇遠績溪闌入叢山關元
度急請援大營時鮑超假歸無統將張運蘭方攻旌德
前後為寇所絀乃以散軍四營往至則寇已大至四營

潰還走休甯徽州城中軍皆大奔元度遂南走開化癸未徽州陷前皖南道福咸死之國藩急檄運蘭還而促鮑超赴軍自太平南還屯漁亭寇益西趨陷休甯將攻祁門大營軍中大震凡前言祁門可屯者皆更請國藩亟去國藩度寇必東南窺空虛乃咨左宗棠率新軍屯樂平寇果分陷瀉安嚴州九月庚申鮑超張運蘭合攻休甯寇敗之十月己卯南陵寇破黟嶺防軍陷黟縣城庚辰運蘭分軍拒戰不利鮑超遣宋國永往攻寇寇棄城屯盧村辛巳增軍大戰破走之十月廣東西新寇俱出江西前後趨建昌河口陷德興婺源池州寇攻建德

敗屯將普承堯十一月連陷彭澤都昌鄱陽浮梁以左
軍屯景德唐義訓自祁門救建德水軍守湖口鮑超還
助左軍寇復敗徽防嶺內軍入黟分黨掠玉山休甯寇
出攻漁亭環祁門無安土屯軍皆斂兵自守

十一年正月左鮑軍合拒寇於鄱建界敗之遂收建德
左軍獨攻寇婺源前軍陷伏中戰不利乘夜引還鮑超
渡江援安慶圍軍二月移建德屯將陳大富軍合左軍
屯景德寇從鄱陽東侵左宗崇禦之金魚橋未戰寇襲
景德破之大富赴水死大富前孤屯南陵有重名自拔
出頗移屯未嘗令當敵至景德十日而死皖浙諸軍將

如大富者已號能戰然其戰守猶不及張運蘭等故寇
恆避湘軍祁門介寇中寇去大營二十里輒引去豈盡
虛聲哉習戰不習戰之異也國藩之駐軍祁門本倚江
西糧臺景德鎮轉運水軍礮船護餉以為萬全至是前
計盡虛左軍退樂平國藩親屯軍合三萬人糧運三十
日不至衆乃爭言取徽州可自立又言可取餉浙江先
是休甯寇無故而宵遯張運蘭久屯休甯城寇亦不復
窺故疑徽州寇弱易攻三月庚寅國藩自將祁門軍進
至休甯徵黟防軍會師癸巳進攻徽州大雨軍械多散
失甲午還休甯戊戌復進庚子寇夜出驚我軍軍八營

潰辛丑遣軍各還所屯國藩留休甯誓死守時左軍破
寇樂平寇益遣黠欵黨往尋戰癸卯寇悉眾攻樂平城
左宗棠亦悉眾出城擊之無部分唯視來寇隊分軍短
兵接寇大敗遂走廣信趨浙江去甲申國藩留軍屯祁
門自將親軍五百人出駐東流於是婁雲慶唐義訓防
漁亭張運蘭守休甯朱品隆杜祁門左軍往來廣饒鮑
超軍專赴急禦巨寇裁自救不復論進取而寇每縱橫
馳突動行千里北則自英山出破蘄黃遂北踞德安南
則攻建昌撫州陷吉安瑞州西出義甯擾崇通東則越
衢州陷龍游湯溪踞金華掠遂昌至義烏破處州卒莫

知其所為議者以為謀解安慶圍或又以寇無略持乘
虛縱掠以為戲要宜急破安慶攻金陵如國藩初議五
月戊子鮑超至安慶攻赤岡寇屯力戰破之禽寇將劉
瑯林磔城下以示城寇瑯林陷蘇常為前鋒自恃其勇
欲以孤壘逼官軍既伏誅曾國荃軍勢自倍鮑超移攻
宿松因援瑞州是日徽州寇襲陷黟縣梗漁亭休甯軍
壬辰朱品隆等合攻黟寇退走丁酉追寇嶺外庚子徽
州寇棄城走得寇聚米供二月軍食左宗棠移屯婺源
甫至汀州寇出德興迎戰敗之七月丙申多隆阿桐城
圍軍大破援寇於挂车多隆阿與鮑超皆湘軍大將寇

與戰必悍黨多隆阿亦自持威重不喜人節度不求人
自助亦不輕助人故寇大上江西湖北一月陷二十餘
城鮑超疲奔命則以李續宜軍游擊李續宜者名尤重
於多隆阿鮑超及行軍忽南忽北殊不遇寇更奏調援
蜀將劉嶽昭自助而浙江亦奏起平元度將軍援浙由
平江出崇通寇乃東南走於是寇帥陳玉成合羣寇屯
挂車謀覆多隆阿軍多隆阿擊走之寇退屯石牌絕其
運道議者復請徵鮑軍多隆阿笑曰吾運道不易絕比
吾軍糧未盡賊已走矣庚戌鮑超追瑞州寇至豐城壬
子寇走撫州八月丁巳朔曾國荃克安慶當石牌之被

寇也寇分黨襲國荃屯後攻戰六晝夜屯堅不可入程
學啓復攻城外寇破三石壘國荃弟貞幹作屯菱湖合
水軍絕寇糧陳玉成屢敗不得進乃相率逃走安慶既
復 文宗翊胡林翼薨 穆宗立以彭玉麟為安徽巡
撫移前巡撫李續宜撫湖北皆辭 詔還續宜安徽已
未多隆阿克桐城庚申鮑超至撫州寇走貴溪辛酉超
奉檄救江北遂還軍是日水軍克池州丙寅鮑超至南
昌聞安慶復復還撫州寇復得廣東新寇合大衆將西
丙子鮑軍至貴溪寇東走追奔六十里平寇壘七十進
復鉛山多隆阿移桐城軍驅寇宿松黃梅廣濟漸李續

宜收黃州劉嶽昭收隨嶽昭軍遂西九月曾國荃進攻
無為克之戊申克運漕鎮甲寅爭東關克之國藩移駐
安慶多隆阿將二萬人收舒城廬江進攻廬州李續宜
部將蔣凝學等將萬人屯六安霍山左軍屯婺源張運
蘭等屯徽州李元度新軍出廣信寇悉赴浙江而皖北
寇聚保廬州國藩軍分守安慶樅陽廬江無為及運漕
鎮東關不足乃令曾國荃益募軍六千謀進取而左宗
棠議大舉援浙鮑超朱品隆等合軍進攻甯國凡五道
並進軍勢沛然矣天子新即位羣臣爭上書言事多
推湘楚軍功以為偏裨皆可督撫因益重國藩頗嘗論

江西浙江江蘇巡撫 詔國藩兼制浙江巡撫提督以
下統江浙四省唯都興阿袁甲三不隸部中國藩皇恐
三奏辭不聽始議援浙以江西湘軍將屈蟠王德榜段
起及水軍孫昌國徽防將張運蘭悉統於左宗棠而以
廣信漕糧奏令宗棠徵收餉軍又分河口景德婺源三
局釐稅益之於是苗沛霖攻破壽州脅巡撫以要權遂
踞霍邱懷遠以窺鳳潁十一月杭州陷寇分犯徽州張
運蘭先以疾歸其弟運桂領軍城守朱品隆唐義訓還
軍赴援品隆義訓常合屯不相能及俱出軍隙益甚品
隆至城下寇來戰軍將不支義訓案兵不相救國藩聞

之大怒遣讓義訓曰湘軍之所以無敵者彼此相顧也
湘軍將雖有讎臨陳未嘗不相援故有晨參商而夕赴
救者私怨情也公事義也爾獨不聞知乎朱鎮危急三
促出軍而不肯應是亂湘軍之制而湘軍由此敗壞也
不急改者將誰容汝吾行軍十年視將士如子弟至於
執軍法以誅敗類必有餘矣又下檄品隆問狀義訓品
隆慚懼相悔謝同上書謝請自今輯睦於是二月七捷
徽州圍解國藩以軍勢已振朝廷鄉用專而浙江全
省地被寇江蘇士大夫朝夕請師乃奏薦左宗棠李鴻
章蔣益澧李桓各授巡撫布政使又請命大臣督己

軍餉 朝命副都御史晏端書專開稅局於廣州沈葆楨前屢召不出至是超擢江西巡撫乃起視事而湖南巡撫毛鴻賓亦國藩舊交故吏及湖北嚴樹森貴州韓超皆胡林翼所薦用駱秉章督四川劉蓉以諸生徑用為布政使李續宜劉長佑則本起湘軍於是西至四川東至海皆用湘軍將帥則皆倚國藩為重略如胡林翼書所言包擘把持者東南爭驚於功名矣

同治元年二月曾國荃新軍至安慶左宗棠軍入浙收開化三月上海具輪船至安慶來迎師以李鴻章率湘軍將及新募舒桐軍往應之鮑超克青陽國荃克巢縣

含山和州鮑超克石埭太平寇衆反正者萬人攻涇縣
克之曾貞榦克繁昌南陵張運蘭克旌德國荃合水軍
進攻沿江諸寇屯丁卯多隆阿前軍將雷正綰等攻廬
州城東南門石清吉等攻西門寇將陳玉成將援寇屯
城東多隆阿攻其崩壘以致師玉成恃勇悍率衆三千
來鈔官軍正綰迎擊交綏寇退據城北浮橋城寇先聞
多隆阿至皆兇懼惟倚援寇自壯及戰開北門出大眾
謀合擊東門軍方出城玉成退則驚以為敗亦北走玉
成遽斷浮橋逼城寇使阻水反拒城寇愈驚相蹂躪城
散走石清吉等梯西南以登城內外寇爭走於是合感

之斬賊數千計俘八百四十七拔民男女七千餘人廬
州復陳玉成走壽州將乞援苗沛霖沛霖聞玉成敗恐
襲奪已眾又畏多隆阿之乘已也反欲取陳玉成自效
玉成至屯軍肥水南苗沛霖陽稱疾遣其黨伏謁迎入
城具牛酒犒三千人者玉成入導至館而閉城阻其從
者玉成初不疑既登堂見几上陳楛鏢乃悟怒罵曰苗
生反復我死行及爾乃自速誅邪沛霖遂囚玉成及從
者二十人獻於潁州勝保營而招誘餘寇寇或降或散
去當是時多隆阿之名懾懾羣寇壽潁弭伏江南聞風
相驚動國藩飛書約會兵多隆阿素以文官不可親且

已不識漢文而亦惡儒吏即報國藩言軍事權宜專一
以微示不與曾國荃同處國藩具言如先約一聽公指
撫官文揣多隆阿終不欲東而四川德安諸餘寇俱入
陝西先已奏遣雷正綰赴援遂再奏令多隆阿自往陝
撫及京朝官亦日言關中帝王都天下最要朝命屬
多隆阿命下官文益自喜當上意決意遣之合軍
江甯之謀不復聽矣國藩獨歎曰多公威名太盛寇知
不敵則必入南山老林此所謂騏驎捕鼠者也與書官
文言江南財賦比秦中何止十倍賊數眾多何止百倍
曩者楚軍有大謀惟以書問往復不先恃奏取朝旨

以相壓故國藩不奏爭而上議於左右宜且止西行以
圖江南官文業建議不肯止多隆阿留五千人屯廬州
而身將萬五千人入陝西詔授為欽差大臣後頻破
寇竟死蓋屋馬壬申曾國荃克宣城癸酉合水軍克金
柱關甲戌收蕪湖五月甲申進屯雨花臺自向榮和春
以兵七萬屯守八年卒潰退國荃軍合水軍不滿二萬
國藩以為孤縣無益未可進國荃議曰諸軍士自應募
起義人人以攻金陵為志今不乘勢薄城下而還軍待
寇則曠日持久非利也若舍金陵別攻甯國廣德或取
潁壽則將士見謂置於閒地浪戰而意怠雖鮑張亦益

猷攻戰將去公而歸耳逼城而屯亦足以致寇軍勢雖危顧不可求萬全國藩許之會左宗棠亦言宜薄城圍攻之勢乃定乙酉上海軍禦寇新橋大破之李鴻章之赴上海也其大將曰程學啟學啟先陷寇中安慶圍合歸誠曾貞榦約以內應為效未及期夜率千餘眾叩貞榦壁門呼曰今事發與寇戰突圍至此追者即至矣吾所將皆情兵當入營助守不能釋兵公相信者開門納我不信急發礮擊我無兩敗也軍中大驚疑報貞榦貞榦屣履出視下令開門納其眾追寇俄而至亦遂還去學啟由此願效死貞榦卒則從鴻章是時上海結英法

二國軍復青浦嘉定攻松江號南路軍學啟劉銘傳潘
鼎新郭松林將湘淮人攻南匯號北路軍寇悉衆攻敗
外國軍再陷嘉定則併南路窺上海學啟將千五百人
屯新橋寇夜圍之數十重礮擊寇尸平壕踐而登學啟
乃開壁突擊寇駭卻鴻章自將來救前後合勢寇大奔
外國軍見其戰自以為不如自此上海湘淮軍始振六
月甯國援寇分三屯與城寇各踞一門鮑超先攻城西
城西者城寇屯也城寇倚援輕進超設伏鈔其後寇誤
以為援至則反鬥官軍合擊大敗之追至城下寇退死
守云援寇發南北屯衆攻官軍城寇出結陳與相應

超分四軍擊之宋國永攻南屯陷陳深入燒二壘寇退而北屯寇棄壘遽奔城外寇盡奔城寇收衆入丙寅城寇復出東門犯官軍未戰引退鮑超自追之寇不入遂東走超亦東追數十里寇乃返門超引軍作圓陳包寇寇將單馬突圍走餘下馬步從遯去得馬千匹俘寇裨將三百死者千計乃還軍攻城城寇皆長跪莫敢拒戰遂復甯國而甯國縣寇將虜城贖其死遂先驅克廣德既復三城或諫超曰甯國城未破而公自追賊至六十里城寇若攻公營進有彊寇退失所據此危道也超笑曰吾但知兵勢不知兵書蓋超之戰專剽銳其持重堅

忍不如多隆阿而終未嘗敗沒其軍杜湘軍為無紀律
然亦能相維繫乃竟以功名終云七月袁甲三請疾
詔李續宜代其事續宜以母喪歸語具臨淮篇微甯大
疫雨花臺圍軍亦多疾病鮑超等不能軍國藩憂懼以
為軍行政取方利而天灾咎重由己德薄任過恐致傾
覆請出朝臣督軍以分己責 詔慰勉且以疾疫流行
寇不能獨彊為寬譬而彊將賢吏相繼物故軍中至無
炊煙乙未程學啟克青浦李鴻章遣軍浮海克餘姚八
月丙子克慈谿自上海軍出浙江江浙兵氣皆振閏八
月蘇常寇來攻曾國荃軍多發西夷火器相燒擊復穴

地襲屯壘連十晝夜不休九月浙江寇復來助攻國藩
急徵援兵皆牽制不得赴國荃以三萬人居圍中城寇
與援寇相環伺士卒傷死勞敝然單搏戰率恃礮聲相
震駭蓋寇將驕佚亦自重其死又烏合大眾不知選將
比於初起時衰矣十月寇解去由九洲北渡敗李世
忠防軍陷和含山巢其南走者合廣德寇西南掠績溪
祁門徽甯安廬俱阻絕唯江上下恃水軍得相聯絡乃
謀增陸軍徵貴州提督江忠義自廣西出江西視寇勢
為戰守以鮑超部將鄭陽和等隸李榕立為新軍留李
鴻章軍將張樹聲三千人助廬桐戰守召還李續宜遺

軍將成大吉蕭慶衍等攻巢和又益募五千人埤曾國
荃圍屯自此統衆過十萬而左李各將數萬合湖北江
西湘軍幾三十萬自餘援軍分布黔桂秦齊者又數萬
連兵不得罷國藩日夜憂危以進攻江甯為非計乃自
行圍察視焉

二年正月國藩自安慶出巡諸軍屯是時曾國荃屯江
甯城西南江北則楊岳斌將水軍屯烏江皆當前敵其
南則羅逢元守太平屯金柱周萬倬吳坤修守蕪湖而
彭玉麟將水軍屯濡須杜江北溧水高淳寇時來窺太
平蕪湖運漕東關寇反出濡須上與和含山巢寇相響

應劉運捷毛有銘等屯石澗埠逼寇西南韋志俊守無
為城以通水軍其西廬江梁美材屯馬廬江北廬州石
清言守之舒城杜廬州西南廬江西北蔣凝學守之舒
城南桐城周寬世守之以南通安慶舒城西北六安凝
學分軍守之北防苗沛霖南通霍山為湖北邊防蕪湖
南則鮑超守甯國屯高阻山而劉松山屯城中易開俊
守涇杜超軍西南吳廷華守南陵杜超軍西稍北杜涇
西北朱品隆先守旌德以救青陽故移守青陽杜南陵
西南又西則池州以瀕江近安慶無屯軍寇踞建平廣
德甯國縣者西出陷旌德太平石埭南破績溪斷徽甯

官軍徽州守將唐義訓恃左宗棠大軍為聲援戊申朔
寇圍涇壬子鮑超救涇入城屯軍癸丑出擊寇大破之
追奔二十里甲寅超還屯二月國藩還安慶以曾國荃
圍軍堅定水陸輯睦始罷退軍之議丁丑朔王可陞攻
甯國寇燒其小淮窰屯鮑超分攻梅領廟埠屯皆破之
寇犯休甯分掠建德西侵彭澤鄱陽東繞池州圍青陽
和巢寇攻石澗官軍自己卯至癸未圍益急擒寇復南
犯蘄水辛卯寇攻太平屯將朱洪章洪章戰敗南北岸
同告急均檄鮑超赴援超疑所往乃先石澗未至寇解
去掠無為舒桐廬江六安而還上海軍浮海攻福山寇

屯破之遂解常執圍三月進克太倉左軍將劉典江西
軍將王沐攻寇夥復其城四月劉連捷蕭慶衍等合鮑
超軍收巢舍山和曾國荃攻破江甯城南西寇壘九程
學啟克崑山五月鮑超等進攻浦口寇棄屯逃走遂收
江浦合水軍攻九洑洲四日破三隘奪洲屯語杜水軍
篇蕭慶衍留屯江浦上海軍攻江陰劉銘傳破寇屯二
十七郭松林破寇屯三十五滕嗣武破寇屯十三六月
程學啟克吳江苗沛霖陷壽州奏劾軍將蔣凝學及逗
留成大吉等降責有差國藩以餉乏辭總督 詔慰勉
國藩李鴻章合奏請減蘇松太倉浮糧 詔酌中定額

除故明積敝李鴻章分軍三道程學啟由崑山進攻蘇州李鶴章等由江陰進無錫淮揚水軍輔之太湖水軍將李朝斌由吳江進太湖潘鼎新等分屯松江上海常勝軍屯崑山為前軍援徽池寇自二月出江西中踞建德鄱陽間左窺景德右出東流湖口江忠義未至席寶田先出撫州趨饒州劉典自徽州來總諸軍諸軍將段起王德榜王沐韓進春及寶田攻陶渡寇屯大破之丙子進春輕出遇伏敗退寇復張趨攻湖口國藩先遣李榕屯湖口及江忠義至壁堅山李榕新軍拒寇不利寇攻堅山忠義出擊之傷寇帥壬辰浙軍將王文瑞復黔

縣庚子遣甯國防軍將何紹彩及水軍礮船援臨淮蔣
凝學等防潁川霍邱七月丁未湖口寇退走都昌建德
彭澤鄱陽寇俱東北走圍青陽銅陵甯國涇皆被寇屯
將拒戰各相持八月乙亥朔劉銘傳攻江陰寇內應官
軍夜登城燒門樓餘寇突門走復其城丙戌李榕援青
陽敗潰江甯圍軍攻城南東西寇屯頻破之乃遣鮑超
還援而水軍將喻俊明及國藩護軍將喻吉三合江寧
義席寶田軍先後至青陽刻期攻寇寇解圍走石埭迨
軍至南陵遂東攻建平庚寅程學啟攻蘇州破東西寇
屯四無錫寇貨輪船自助周壽昌燒其輪船石埭太平

寇頻犯甯國涇敗去乃詣朱品隆請獻二城及旌德以
自贖九月壬子收三城散遣歸誠人四萬彭玉麟督水
陸軍攻太平沿江諸寇屯進高漕高漕寇將請歸誠十
月乙亥收高漕鮑超楊岳斌俱會師東壩寇震恐丙子
易開俊自涇劉松山自甯國合軍收甯國縣東壩寇開
屯迎官軍辛巳收東壩壬午連下建平溧水東壩既克
皖南金陵蘇浙軍勢相連鮑超全軍屯守之王可陞守
溧水李榕守建平歸誠人洪容海守高漕青陽石埭太
平旌德涇及甯國府皆分軍屯守戊戌李鴻章復蘇州
蘇州之合圍也程學啟軍所至輒破寇壘城寇諸將權

不相下相猜貳因謀反正斬異議者開門納軍然不交
兵猶擁衆號十萬己亥出城者八寇將謁鴻章受二品
冠服乃謁學啟學啟先已置人於坐數其罪悉引出斬
之報鴻章鴻章大驚懼學啟入城諭衆衆皆聽命或頗
散走而先與寇將誓約者曰副將鄭國魁恨負約涕泣
不食臥三日鴻章亦頗咎學啟輕發且曰為己甚君亦
降人也學啟大怒還營將引軍去其營員奔告鴻章鴻
章復過學啟陽論他事笑語甚歡事乃解庚子安徽巡
撫唐訓方收懷遠辛丑苗沛霖突蒙城圍被斫死十一
月李鶴章等復無錫進攻常州以應江甯圍軍程學啟

出太湖圖嘉興以應浙軍潘鼎新等軍先入浙收平湖海鹽寇爭應官軍所至輒下遂收嘉善曾國荃益募新軍增圍師圍城官軍遂至五萬人援寇還江甯城者皆不敢出左宗棠議以為當分軍攻廣德國藩以寇勢猶盛而江忠義新亡懼軼蹂江西持不許李鴻章諸軍銳進深入宗棠復奏言嘉興常州可緩攻朝廷俱下其議三帥卒各主己說守其便宜焉

三年正月戊申甯國寇西南掠績溪遣江北將毛有銘將六千人援徽州浙軍將王開琳先還赴急寇疾走舍徽州不攻北犯湖口南趨景德別黨由浙入玉山由閩

入建昌均期會撫州徽州守將唐義訓不能禦毛有銘
未至以戰事委江西語杜江西後篇戊午曾國荃攻鍾
山寇屯克之時東壩屯重兵太平防輕移金柱屯軍助
圍師及江浦廬江守將皆先率軍會城下新募軍亦俱
集乃謀合圍寇之設守也環城多為石壘尤重於北既
於鍾山作大城號曰天保又於山脊入城處作大城號
地保官軍攻城西南不甚懼至進屯明陵則出衆力爭
之向榮和春皆以此敗二年夏鮑超已作壘明陵前會
當移軍自平壘而退國荃圍攻幾二年破寇壘以百數
終未及城北及破鍾山壘移軍屯守更增築壘屯軍五

六千逼北道餘元武湖阻水為圍城寇糧運絕矣丙寅
郭松林等克宜興二月癸酉溧陽反正寇走江陰圍常
熟攻無錫李鶴章還守無錫郭松林援常熟寇皆敗撤
程學啟急攻嘉興寇請降學啟瞰城中知其詐攻益力
陳亾勇將何安泰學啟親搏戰薄城先登槍子傷額遂
克之學啟養傷蘇州創已合一日獨坐深念有所忿誤
發創口血溢竟死自學啟之歸誠經百戰每戰料勝敗
無所失或知當敗則戒諸將曰公等皆不善敗吾當自
餌賊某時敗某時期某所來援賊可退矣諸將素憚服
其能謹如約則如所言至其突陳陷圍見者以為神兵

夷將戈登尤敬之及其死以所建旗歸訛海國推為名將焉江蘇之戰始上海終嘉興功成而學啟死其名位亞於多隆阿矣辛巳廣德州寇棄城走湖州自蘇杭江甯軍並進論者皆以廣德為要害以官軍力不足不敢攻惴惴恆恐寇迸出及寇棄去乃知其無能為始議鮑超進攻句容其時李世忠已獻還五河天長全椒來安六合滁州而鎮江軍將馮子材等亦頗出兵助攻句容丹陽江甯寇頻驅老弱女口出城以節食更於城中種麥刈草為糧庚寅左宗棠克杭州三月壬寅鮑超克句容甲辰進攻金壇馮子材飛書請先攻丹陽乙卯解金

壇圍伏兵茅山待追寇寇果出中伏返走追奔五十里
寇不入城城寇反出走丙辰克金壇乃還軍援江西是
時浙江寇走徽州號二十萬徽防將毛有銘出戰輒敗
寇深入江西前隊至宜黃崇仁南昌戒嚴四月庚午李
鴻章克常州壬申馮子材復丹陽 特詔楊岳斌督軍
江西尋授陝甘總督又 詔李鴻章移師合攻江甯捻
寇自河南犯麻城議遣王可陞屯無為李榕屯桐城未
行寇復踞廣德趨徽州者日夜相繼楊岳斌鮑超皆西
援乃以江蘇軍將劉銘傳屯句容鄭魁武屯東壩五月
壬戌郭松林克長興於是江甯圍軍以城破可計日而

李鴻章當來會師恥借力鴻章鴻章亦讓功託言盛暑
不利火器延不至 朝命促會師懃急曾國荃憂憤日
約將士穴地隧城期必破而龍膊寇屯所謂地保城者
不得則形勢終不便乃日夜發礮攻之己巳奪其壘遂
作礮臺其上穴其下又環城列隊十餘道並攻積溼蘆
沙草高等城以疑寇使多備六月甲申地道成乙酉曾
國荃令圍軍百營皆嚴備別縣賞募敢死將士待城破
先入於是李臣典等誓先登者九將日午地道火發城
崩二十餘丈寇反然火藥下燒我軍朱洪章等乘城缺
登張詩日等循城據北門彭毓橘據東門朱南桂羅逢

元等皆梯而登寇散走或出城或還保子城夜半縱火燒城中因突圍出走黃潤昌等露立龍廣山袁大升等循城南遇逃寇要擊誅斬數百張定魁等追寇及之湖熟復俘斬數百人城寇多自焚或投池井洪秀全已前一月死其子洪福年十八九餘寇挾之走廣德洪福刻印姓名列真王二文軍吏誤合二文為瑱奏 詔言洪福瑱者以此江甯既復羣寇出掠者皆瓦解國藩奏上諸將功以所俘寇將李秀成言洪福已死於是浙江江西諸軍方欲張寇勢洪福又實不死李秀成者寇所倚渠首初議生致闕及後見俘寇皆跪拜秀成慮生變

輒斬之羣言益譴爭指目曾國荃國荃自悲艱苦負時
謗諸宿將如多隆阿楊岳斌彭玉麟鮑超等欲告去人
輒疑與國荃不和且言江甯鐵貨盡入軍中左宗棠沈
葆楨每上奏多譏江南軍會病疥因請疾歸鄉里散
遣所部軍二萬五千人而克城功最受封爵者李臣典
病卒蕭孚泗以喪歸大功雖成然軍氣憤鬱慘沮英國
藩本以憂懼治軍自幸平洪寇克江甯如初起兵時所
望力言湘軍暮氣不可復用主用淮軍後以平捻寇然
席寶田左宗棠仍募湘軍征苗回竟定塞外校威天山
烏覩所謂暮氣者邪自國藩始勅用鄉農代額軍招之

則來麾之則去見湘軍者乃知軍利敵胡林翼左宗棠
李鴻章皆由此起故各係其用兵之地而獨以國藩本
指為曾軍前後篇

曾軍後篇第五